

# Powšitkowne WOZJEWJENJA

njedźelu, 23. julija 2017

## Kemše w Krupce

Na putniku Božu mšu srjedu, 26. julija, w 10 hodź. w Krupce pojedže zaso bus. Štóz chce sobu jěć, njech so hač do pónđzele, 24. julija, w Šmitec wozydłownistwje w Radworju přizjewi, telefonowe čisło (03 59 35) 28 60.

## Wodženje po wustajeńcy k reformaciji

Kurorka Andrea Pawlikowa powjedže tutu njedźelu, 23. julija, wot 15.00 hodź. w Budy-  
skim Serbskim muzeju po wosebitej wustajeńcy „Pječ lětstotkow. Serbja a reformacija.“  
Wodženje budže w němskej rěči.

## Kurs k wudebjenju cyrkwje

Kurs floristiki přewjedže Smochčanski Dom biskopa Bena sobotu, 12. awgusta. Při tym  
pokaza so, kak móža so wołtarniščo a cyrkej na druhich městnach wudebić. Zajimcy měli  
so hač do pónđzele, 7. awgusta, pod telefonowym čislom (03 59 35) 220 abo z mailku na  
info@benno-haus.de přizjewić.

## Seminar k spiritualiće a kreatiwnosći

„Rosć na tebi“ rěka seminar, kotryž přewjedže so wot pjatka do njedźele, 1. do 3. septem-  
bra, w Smochčanskim Domje biskopa Bena. Při tym pónđže wo wotkryće „nutrkownych  
swětow“, kotrež hodža so ze swójskej kreatiwnosću, molowanjom wobrazow a symbolow  
zwuraznić. Zaměr je, zo wobdźělnicy swójske ressource wotkryja a (znowa) do zwiska  
ze zmyslom swójskeho puća přińdu. Farar dr. Hans-Konrad Harmansa, eksercicijowy  
nawoda a duchowny přewodźer, a Maren-Magdalena Sorger, duchowna přewodźerka  
a terapeutka, budžetaj seminar nawjedować. Zajimcy měli so pod telefonowym čislom  
(03 59 35) 22 317 abo z mailku na referent@benno-haus.de přizjewić.

## Na ekskursiji z jězbu na łódži swjateho Bena zeznać

Na cyłodnjowsku ekskursiju z jězbu sobotu, 26. awgusta, na łódži po Łobju přeprašuja  
Katolska akademija Drježdžansko-Mišnjanskeho biskopstwa, Mišnjanska Ewangelska  
akademija a „Schlösserland Sachsen“. Za čas jězby z Drježdžan do Mišna pod temu  
„Pokład, kotryž njeje ze złota“ poskića so „rozmołwy na łubi łódže wo saksim přenim  
swjatym“. Profesor dr. Josef Pilvousek z Erfurta a dr. André Thieme z Drježdžan před-  
stajitaj wosobu biskopa Bena a rozestajenja w zwisku z jeho swjatoprajenjom za čas  
reformacije. Na wróćopuću budžetaj ewangelski krajny biskop dr. Carsten Rentzing  
a profesor dr. Christoph Böttigheimer wo wuznamje cyrkwje, hódnoće dźiwow a roli  
swjatych diskutować.

W Mišnje je wopyt wosebiteje wustajeńcy wo swjatym Benje z wodženjom předwidžany.  
Přinošk za ekskursiju z jězbu po Łobju tam a sem wučinja 29 eurow. Zajimcy měli so hač  
do srjedy, 23. awgusta, na internetowej stronje Katolskeje akademije pod [www.ka-dd.de/  
GespraechenAnDeck](http://www.ka-dd.de/GespraechenAnDeck) přizjewić.

## **Mjezynarodnje warić**

Na kulinariske wokřewjenje přeprošuja Budyski Šulski centrum Charity, Hornjołužiski zwjazk Charity z.t. a Budyska wosada swjateho Pětra. Ludžo ze wšelakich krajow swěta přihotuja jědže zhromadnje w internacie Šulskeho centruma Charity, Před Šulerskimi wrotami 21 (zachod wot Grólmusowej). Předwidžene je, zo warja na scěhowacych srjedach, 26. julija, rusce, 9. awgusta afghanisce, 23. awgusta kolumbisce, 6. septembra francosce a 4. oktobra lybisce, spočinajo stajnje w 17 hodž. Wotpowědne zetkanje z warjenjom syriskeje jědže budže srjedu, 20. septembra, ale hižo w 16 hodž. W zwisku z Mjezykulturnym tydženjom scěhuje samsny dzeń přednošk wo žiwjenju žonow w Syriskej. Dalše informacije podawa Hornjołužiski zwjazk Charity z.t. pod telefonowym čislom (0 35 91) 49 82 40.

## **Mužojo přińdu z Marsa, žony z Wenusy**

Poradźowarnja za mandželstwa, swójby a žiwjenje Drježdźansko-Mišnjanskeho biskopstwa přeprošuje pory wot pjatka wječora do njedžele připołdnja, 11. do 13. awgusta, na seminar pod heslom „Mužojo přińdu z Marsa, žony z Wenusy“. W srjedźišću kursa w Smochčanskim Domje biskopa Bena ma prašenje za potajnstwom dobreho partnerstwa stać. Nawod změjetaj poradźowarjej Dorothea Kramß a Alexander Burghardt z Lipska. Zajimcy měli so hač do pjatka, 28. julija, pod telefonowym čislom (03 41) 9 83 00 71 abo e-mailowej adresu efl-beratung.leipzig@bistum-dresden-meissen.de přizjewić.

## **Dopomjenka na pasionsku hru**

Tele dny wušła 28stronska dwurěčna brošurka z mnohimi barbnymi fotami dopomina na přewšo wuspěšne předstajenje pasionskeje hry w septembru 2015. Zdobom je krótka informacija wo katolskich Serbach zapřijata. Na předań je brošurka za pječ eurow pola časnikarja Jürgena Njeka w Chrósćicach. Štóž sej brošurku kupi, dóstanje k tomu DVD z filmom wo pasionje.